

73055

3

武夷山志卷之四

東魯衷仲孺編訂

僊真編

流釋子附

看山好譚服食晚歲忽著論異人有無紫陽  
講學茲山叅同悟真手爲訂注山有僊霧形  
之飛咏而謂魏子騫輩爲避世之士衆所臣  
服遂傳以爲僊兩公寥廓之見亦不免牽于  
腐說而搖移如此獨不睹靈異具存且莫若  
或遇之使徐福樂大諸人返海上之艤鱣叩

漫亭之絕巘何必不如僊惠亭之小吏俱化  
乎胡以明其然也雲水瓢笠之徒如蟬而蛻  
者不一而足何莫非武夷之成案也爰述所  
聞以徵非妄

統計凡二十七條

彭祖姓錢名鏗傳稱其嘗造雉羹於堯堯封之彭城  
故稱彭祖隱居幔亭峰下得養生秘術茹芝飲瀑  
乘風御氣膚如處女顏若舜英歷娶六十七妻年  
七百七十七歲有子曰武曰夷亦隱是山山因是

得名

皇太姥相傳爲神星之精母子二人來居於此采黃  
精以餌能驅檄風雷乘雲而行秦人稱之爲聖母

或稱皇太姥今封太元夫人詳見祝穆記中

劉少公舊稱武夷山主按雪笈七籤云武夷爲昇真  
玄化洞天真人劉少公治之

控鶴仙人名屬仁乃天台元虛老君華真僊師第七  
子也嘗駕鶴至武夷時魏王子騫與張湛等禱雨  
龍潭而僊人適至騫等具懇遂獲甘霖湛因獻詩

曰武夷山上武夷君白馬垂鞭入紫雲空裏只聞  
三奠酒龍潭波上雨紛紛屬仁語子騫與湛等先  
以酒失忤黃元真人謫居此山八百年後仍得蛻  
化因授以九品丹書

魏王子騫本閩之延津人相傳爲魏王子又云魏時  
人姓王名子騫皆不可考入山修行時張湛孫綽  
趙元奇彭令昭劉景顧思遠白玉生馬鳴生及女  
眞胡氏李氏魚道超魚道遠凡十二人求道武夷  
依子騫爲地主遇控鶴僊人授以丹訣後皆僊去

以黃心木樾藏蛻骨於小巖巖中宋端平間歲旱  
迎至太乙宮禱之甘霖立應詔封十三人皆爲眞  
君其從神潘遇先世居中奢舖因子騫給奉十二  
人後移居御茶園亦得僊去于是亦封爲通靈協  
濟侯邑中每遇旱輒迎禱無不響應

許碯自稱高陽酒徒唐時人少舉進士不第學道王  
屋山辟穀養氣十餘年宇內名山無不遍歷嘗登  
幔亭絕頂題云許碯自峨眉山尋偃月子到此又  
作詩云閨苑花前是醉鄉誤翻玉母九霄觴羣僊

拍掌嫌輕薄請向人間作酒狂或詰之曰我天僊  
也在崑崙就宴失儀見謫人皆笑爲風狂忽朝乘  
雲而去

婁師鍾晉時人修煉山中茹芝朮勤吐納吸日月精  
光後冲舉而去

薛邠唐時人修煉山中其實失傳見止止庵記

李鐵笛洛陽人李磨鏡燕山人名字世代俱無可考  
但白玉蟾記止止庵以爲于之修煉後皆僊去

李陶真宋熙豐間至武夷止止庵出祠牒示人乃唐  
開元時所給者衆俱笑之爲人落拓詆諧好吹鐵  
笛每作穿雲裂石之音或屈節臘諸道士招飲凡  
十餘房真無不在者笛韻同時並作衆俱駭愕嘗  
與衆共泛忽自投於深潭及歸而真已鼾睡榻上  
矣已又入通僊巖踪跡莫定一日齋沐與衆言別  
留詩云毛竹森森自剪裁試吹一曲下瑤臺當途  
不遇知音聽拂袖白雲歸去來遂吹笛乘雲而去

張草衣名字莫考然白玉蟾常記其事

孔氏莊氏葉氏俱浙之上虞人唐天寶間于天柱峰

前遇元君授以丹訣指其往東南覓修煉之所乃于均峰得雲虛洞以棲焉道成乃投身于換骨巖遂僊去治平間歲大旱里中有江小三者遇三女于均峰之下知其爲僊也因訴以旱故三女授以小葫蘆盛水少許令灑之是夕大雨霑足乃獲有秋江往謝緣山徑深入忽有洞曰雲虛之洞有小童導之使前三女餽以胡麻餅歸行數里桃花夾徑渡一小澗出三姑石下至家已三載矣

鄒道人失其名清獻趙公宰邑時鄒以產戶辟爲錄事奉公甚恭一介不妄取公秩滿鄒自是棄妻子學道武夷山中過昇真洞遇張真君授以九轉丹訣得道尸解於幔亭峰

吳懷玉邑之新豐鄉人習靜武夷山中行坐常閉目人問之故不荅因稱爲眇翁年九十六而化初真人之未解也每醉輒狂歌大笑指武夷君像曰歲在戊子降爲人主指魏真君像曰三十有八載當撫平四海故楊文肅公家集云真宗神宗哲宗皆十三僊降世真人化去之明年太乙宮監齋某遇

之於京城言武夷瑞世之說尤詳建州守陳覺民  
過武夷詩曰昇真洞口接天門霧艸丹花日日春  
聽說列僊來瑞世三朝德澤在斯民又王埜有歌  
云列僊高拱今宅玄都三聖繼御今恢炎圖措斯  
世于平又應皇家今瑤符

備見方輿勝覽及舊志

王通永平人宋元豐間學道武夷居毛竹洞深窈玄  
旨能飛神御氣呼召雷雨治平三年五月念五日  
坐化于會聖洞詔封洞明普靜真人僊蛻尚存

徐熙春邵武人熙寧中學道武夷常夢一鐵冠道人  
容貌雄偉相揖共語覺而異之詰朝邂逅一人宛  
若夢中見者自云姓蔡且邀之飲臨別云至某時  
當晤于昇真洞下真人如期而往則鐵冠者已先  
在矣因授以丹訣後坐化洞側崖穴中遺蛻如生  
萬曆間邑侯以禱雨得應遂建樓于會真廟左迎  
蛻以祀之

張垓後漢三山人又云名湛坐化于大王峯半壁石  
室中相傳謂其解化時其母追呼之首因轉盼巖  
下故遺蛻亦復爾爾背上有白點如錢者六七右

武夷山志  
手有一杰字坐旁一石方正如棋枰上有金蟾昂  
首向蛻因號爲張金蟾萬曆初年直指楊四知見  
其裸裎近褻因塑而飾之仍護以鐵欄云

徐頃邑之黃連坑人嘗于三髻山遇二僊對弈方啖  
菓擲其餘于地日使食之歸卽辟穀且善知人意  
內事所居常有雲氣出其上行步如飛雖巉崕峭  
壁若履平地入水火不能焚溺乾道中歲旱邑侯  
諸葛庭瑞迎之使禱雨真人登永隆寺鐘樓望三  
髻山大呼聲未已而雨下如注尸解後鄉人爲之  
立祠山中徃徃有人于昇真洞見之

郭道人埋其名自稱臥雲子居武夷預知人禍福輒  
奇中紹興中邑人諸葛行正遇之于途因言行正  
生平事如目覩行正異之遂師事焉同行市中遇  
武弁趙姓者曰此人吾親見死于京師何以至此  
道人謂行正曰人旣識我矣尚可畱乎正曰然則  
將何之曰孤雲野鶴初無定處後三年復至正事  
之如初因授以長生之訣俄而同日坐化道人于  
昇真洞崖石上行正于鐵板峰頭時乾道壬辰入

月也

知微子樵陽人嘗採藥山中遂結茆于毛竹洞旁餌松飲水得冲舉術有知微子一卷行世坡公常爲序之

白真人名玉蟾號瓊瑄本姓葛名長庚大父曰有興福州閩清縣人董教瓊州而生真人于瓊紹興甲寅三月十五日也祖父繼亡母氏他適因冒白姓真人天資聰敏髫齡時背誦九經十歲來廣城應童子科主司命賦織機詩卽應聲詠曰大地山河作織機百花如錦柳如絲虛空白處做一匹日月雙梭天外飛遇泥丸真人陳翠虛携入羅浮未幾遍遊名山於黎母山中遇神人授以洞玄雷法能呼召雷雨馘攝精魔後又師事泥丸翁於羅浮者九年盡得其還丹秘訣經書一覽卽了大義文思汪洋頃刻數千言又善草書有龍翔鳳翥之勢自讚云千古蓬頭跣足一生服氣餐霞笑指武夷山下白雲深處吾家封紫清明道真人彭鶴林又紀其成道後出沒隱顯變化莫測真人舟嘗過鄱陽

湖篙師值日暮議泊真人剪紙月噓于檣端皎然  
達旦而舟行無沮又嘗與衆泛舟西湖酒酣躍入  
水中衆驚呼援溺真人出水面搖手止之而沒後  
忽見於海豐縣嘉定末詔徵赴闕對御稱旨命館  
太乙宮一日不知所往

陳冲素號虛白入武夷修道遇異人授以丹法著規  
中指南盡發內丹三要之旨嘗與一樵者飲忽仆  
地夢入一洞府有物迸出傍有人指之曰此青靈  
芝也卽採食之自是飲水不復粒食年餘僊去

吳公名代失傳在鼓子峰右石室中修煉得道偶將  
炭于石笋上畫階而上隨畫卽登遂僊去因號吳  
公洞遺蛻尚存

丘公不詳名氏在靈巖後石室中坐煉晝夜精思頓  
然覺悟一旦坐化留詩曰本是瀛州僊子徜徉玄  
化洞天咲指蓬萊歸去冲飛笑入蒼煙因號其巖  
曰丘公巖

黃樸樵川人紹興初訪道武夷山中逾數月尋歷殆  
遍無所遇忽於白雲巖下見草庵有道姑屏處長

正夷山志  
看紅頰見樸問其來故答曰洞天有名而無實德  
不可見也時日已暮姑欲邀宿樸曰汝婦人獨居  
於義不可姑曰此地多虎恐君見傷樸竟不肯入  
危坐戶外半夜果有虎咆哮而來姑急開門呼之  
答曰寧死于虎決不入遂堅坐達旦虎已潛去姑  
嘆曰君真有志洞天去此不遠然尚隔深淵非臂  
羽足雲不可渡君試往若遇樵者當拜而問途及  
至水際溪流洶湧方顧盼間有樵者來樸乃如姑  
教樵者怒曰饒舌老婆妄泄吾事遂令樸閉目挽  
其衣步雲而行俄至中岡見宮殿崔嵬一人碧冠  
朱履謂樸曰汝何人敢至此空速回積功累行他  
時或可再來遂與胡麻飯食之遣出至崖下回望  
高山深谷窅非昨境道姑與庵亦失所在樸自是  
絕粒化于三仰峯

金志陽號笠庵永嘉人蓬髮不櫛人因以蓬頭僊人  
稱之嘗遇李月溪授以丹訣遍遊名山後至武夷  
道術不振病者叩求隨以供菓餌之無不立愈歲  
旱召龍警以偈語入水少頃大雨如注居止止庵

冬不爐夏不扇至元庚辰趺坐而化

王廣邑之黃連坑人幼嘗墮水忽濤浪中一僧挾出  
掀之至岸嘉靖間學道依楊道人于武夷勵志苦  
修爲衆窘辱不校遇異人指授每登山往田人見  
有兩王廣云將化前一月語道衆曰我卽日欲歸  
柰師遠出未旋何旣數日又曰師今至某處矣策  
杖逐之師回語以欲歸之事師戲曰汝何日歸乎  
曰明日師曰我方回欲架屋姑少待卽應曰諾又  
月餘復問師曰今可矣但卜何日荅曰明日師猶  
不信詰朝齋沐別道衆端坐而逝全蛻見存水簾

洞中

羽流 凡九條

李良佐字玄輔南唐後主李璟弟也賦性冲澹精心  
玄詣寶大八年辭後主訪道武夷遂居之舊觀剏  
在洲渚間後主勅有司移建今址賜額曰會僊禁  
環山毋得樵蘇鑄銅鐘一口重千餘觔自金陵航  
海達閩而至山中封爲演道冲和先生復增飾觀  
宇賜田給衆後三十七年坐化於清虛堂乃本宮

開山之祖也

江師隆號三白建陽人本儒家子風儀秀拔訪道武夷山中得五雷秘術能致晴雨紹定間錢塘有水孽爲害詔赴闕以法力殄平之賜號金門羽客已而乞歸武夷御書常庵二字賜之于時尤袤徐清叟尤尊禮之清叟贈有詩云上天入地一鶴鞭風駕霆片符欲識常庵妙處易中曾着工夫九曲溪頭活計三生石上精魂聞早鬧藍袖脚空山歲晚啼猿後端坐林壑堂而化

彭日隆邑之吳屯人居冲祐觀遇異人授以雷法祈禱皆應生平未嘗學問惟讀清淨經妙達玄旨信口吟咏皆蕭疎有致嘗自讚云五五二十五只管從頭數到底一也無松稍月當午居清微太和宮後坐化虞集常爲之記

張與玉號霜崖三山人博雅善詩居僊真洞遇異人得秘訣悟玄牝洞徹先天一氣禱求立應四方從學者甚衆閩憲觀公薦于朝以疾辭制授法師無疾而化

林文能號存心三山人恬澹博洽精于玄理常詮衍  
諸品與義羽流咸師事之遇神授銅符用以治病  
祈禱鮮不立應結廬于大王峰頂雖霜霰交集爍  
膏流金不爐不扇三十八代天師留國公聞于朝  
詔赴闕以疾辭賜號講師泰定甲子年九十有五  
端坐而化

張克真號平心三山人居武夷時邑之光化寺有妖  
狐爲祟寺僧請于真召雷擊之其患遂息福寧州  
太旱真投符龍湫隨見金魚啣符以入頃刻雨大  
作州人德之及歸相率追送經飛鸞渡而舟覆溺  
者甚衆真儼然端坐指顧之頃皆出自波間衆益  
敬服三十九代天師太玄薦之于朝寵命方下而  
已化矣

程斯道永平人程正公八代孫學道武夷師事林文  
能留止止庵中授以丹訣及岳瀾忠孝雷書禱雨  
頃刻可致詔赴闕賜號玄通子住持三茅山

王與敬號秋崖三山人少入武夷遨遊湖海叅訪高  
真留雲州遇亢旱祈禱大應城中妖興夜聞人馬

之聲長吏請其治之妖頓滅丞相李固等交薦于  
朝賜號至道玄應通妙法師至大二二年奉旨還山  
護冲祐觀嘗有詩曰依然拂袖歸山去止止庵前  
伴白雲竟化于止止庵

江成真號心隱建陽人從武夷張巖隱游清修嚴謹  
法師黃雷困見而奇之授以清微雷法祈禱輒應  
後聞于朝賜號優禮晚歸築室水簾洞未幾無疾  
而化

### 釋子

僧慧明不知何許人天啟壬戌從南海來結茅于  
焰峰巔不下山者今二十載四衆叅叩殆無虛日  
鍾伯敬詩遊半不逢僧以爲恨事而公以禪宗闡  
化茲方亦疇昔之希觀也

武夷山志卷之四終

武夷山志卷之五

東魯東仲孺編訂

存疑編

志倣史而作者也傳信示實謂之信史疑則  
闕焉疑而仍存非古也然而太人之占夢齊  
諧之志怪子瞻之姑妄言之率是類也雖疑  
而復存之存之亦猶行古之道也

統計凡九條

楊萬大性尚恬靜結茅武夷漁樵山水間夜則懸燈

獨坐撫琴詠詩一夕有道士黃冠玄服貌甚偉扣門云欲往萬年宮瞑不便濟求假榻一宿大因留之自後數往來而禮之益勤一日復來謂大曰吾非世人也今當歸洞天特來別汝吾觀汝所爲甚善天必有以報之汝老矣其在後人乎命舟欲與偕去萬大始諾之旣而戚然告曰吾二親未卜窀穸豈可去乎道士曰然吾待汝勸事畢與汝偕往未晚因與其舟至甌寧之豐樂里指溪灣秀峰下曰汝於某年月日奉父母柩於此俟有白狸眠處卽葬所也白狸躍起卽葬時也大如期奉柩至山中果見白狸如所言葬之不逾年而他處子孫聞其地饒衍多來居之因名其地曰楊墩墓曰白狸窠時年已九十有七一日晝寢夢前道士來迎曰汝今大事已畢當與俱去覺卽沐浴更衣端坐而逝今太師文敏公榮卽大之後也

楊文公億其初生也母章氏夢羽衣人自言武夷僊托化旣而生則一鶴雛也盡室驚駭貯而棄之江其叔父曰吾聞間世之人其生必異如姜源有棄

簡狄有契乃追至江濱開視鶴已蛻而爲嬰兒矣  
體猶有紫毳尺餘彌月乃落見億本傳

劉夢鼎邑之五夫里人忠顯公曾孫也母未孕之先  
夢一羽衣人手捧三足香爐至其家曰以此寄在  
汝家當有嘉應自是而孕十二月始生遂名夢鼎  
少而穎異嗜學師事侍宸黃雷因得清微道法主  
行霧寶齋醮多有異應會邵武九龍觀延之建黃  
籙大齋而枯井湧泉天降甘露自是而四方從學  
者翕然一日應南浦真氏建醮之招途遇一道士

請謁問其姓名云是武夷侍者迂公回山須臾不  
見及歸家家人夢亦同遂沐浴趺坐而化

見舊志

至元間草寇毛興入自南浦欲止宿冲祐觀肆行劫  
掠晚至三姑市見洲渚間旗幟森布上皆有潘字  
兵衛劍戟如林寇懼卽退駐梅溪詰朝邑兵分爲  
兩翼夾攻擒之云本欲逃去見四山兵馬圍繞脚  
如束縛是以遭獲耳

見本縣志

黃咸中東陽崇山人少習蓮社歸自后山假宿止止  
庵夜半有道人步月而來坐盤石上呼咸中語之

曰汝宿有道緣名在僊籍吾有秘法授汝可依吾  
教遂出書一卷及銅印方廣寸許其文乃清微訣  
法令佩此可濟世延年仰視天際見有綵雲捧月  
遂令更名慶雲仍約曰此後愈宜勤修七十年後  
再會于斯咸中再問其姓名荅曰東南子乃吾名  
也不須過問騰空而去咸中自是卽棄妻子絕嗜  
欲遍遊名山叅求至道住洞空山二十年號爲洞  
空子後回武夷蛻化時年九十計之正所符約  
宋咸淳間蜀人彭澹軒罷江東倅游武夷山嘗獨行

林藪入草庵中見二人峩冠博帶對食招彭共坐  
俎中豕首一羊肺一鷄一所言皆先天圖易性理  
之學玄妙深奧不可曉彭請其姓字右坐者云姓  
魏山林野叟無字可稱左坐者不荅日暮辭歸明  
日携榼再往已無徑可達下山至一富家言所以  
富家云異哉昨者至朱祠致祭正俎中之殺方悟  
左者爲晦翁右者魏鶴山也

元異聞總錄

天聖二年二月朔夜石堂寺爲雷擊而陷寺僧皆沒  
惟一僧名居仁及二童行日子雲子明者獲免三

人者聞雷雨初作時開戶而視忽若有人掖之以去恍惚不省所往明日鄉人來視乃在塔前李樹下如夢方覺因備述所見云

劉侍郎夔少時肄業山中一夕方篝燈展卷忽有手藍色毛穆穆然從窻隙入爲剔燈劉遽執其手署押於上乃叱使去鬼曰吾不能去矣告侍郎乞去所署劉如其請手始得去後劉果歷工戶吏三侍郎享年八十有三

游三蓬者秦時人也少孤與弟乞奴漁于溪澗晨夕

歌呼相和不問寒暑惟以三莎蔽體人謂之三蓬或憐而與之短褐數日亦復棄去始皇二年舟泊梅溪渡口有一老父襤褸殊甚問游求渡游兄弟以其老揖而濟之且叩所往老父曰旦日皇太姥宴羣僊於玄化洞天子能從我游乎三蓬兄弟相視而駭長跪曰幸甚老父遂令瞑目坐舟中但覺蓬蓬如飛食頃忽聞鶴唳竊視之則二舟已閣巖罅不復動矣於是玉皇太姥乃使謁者設虹橋從巖際引入金闕三蓬兄弟及山下數百人以次展

謁畢賜宴彩幄下仍以次起上太姥壽酒罷命循  
故道而抵家遂絕粒惟飲水而已漢昭帝時或見  
之於幔亭峰頂行步如飛今巖隙僊船卽游所掉  
者也

嘉靖間有一田父訪道武夷忽於天柱峰下遇一樵  
者坐譚久之因問曰父曾見僊乎田父曰吾未之  
見所謂僊窟盡虛妄耳樵者笑而不荅因出袖中  
詩與之曰曾賣金陵酒一卮與君相共話玄機壺  
天有路容人到凡骨無緣跨鶴飛莫向煙霞驚縹  
渺好歸鄉國認依稀可憐寂寞空歸去休向紅塵  
說是非田父以詩示人忽香風飄落字跡皆滅自  
此不食不眠浪迹雲水不知所終

楊翊字正臣浦城人嘗游武夷至勝處必有題詠旣  
歸有道人投刺自稱張湛然翊館之南園當夜月  
明如晝道人于池上長嘯須臾雲氣慘淡清飈四  
起衆皆寒悚忽雙鶴從空而下道人遂跨飛去翊  
始悟十三真君中所謂張湛者也取刺視之乃白

紙耳

見浦城志

武夷山志卷之五終

武夷山志卷之六

溫嶺衣仲藹輯撰

物產篇

山澤之產志風土者類謹書之武夷隸于崇則崇之風土已矣烏事再志是不然十五國之風土一統志已盡括之矣而省直不厭再志省直已盡括之矣而郡邑仍各爲志蓋簡牘繁所志必畧略亦讀志者之所病也房州杜若雖爲唾資然職方氏固未詳于讀志乎

統計凡二十一條

茶

諸山皆有惟接笋峰鼓子巖金井坑者爲尤佳以清明時初萌細芽爲最谷雨稍亞之其二春三春以次分中下至秋露白其香擬蘭但性微寒耳大抵茶質不甚相遠在製烹有法予之茶說所載頗詳按宋元時有北苑龍團之貢遂編徭役名曰茶戶每歲差官督製民疲奔命苦不可言至國朝竟罷之而茶戶之困如故蓋有司取以薦新胥役每賄管是差以飽其欲耳嘗見唐子畏戲爲虎

丘僧題云皂隸官差去取茶只要紋銀不要賒縣裏捉來三十板方盤捧出大西瓜使子畏而在不知當更作何語也

蘭 大王峰陰及各處多有之一莖一花色如綠玉微綴朱絲清香四達

黃精 按博物志云太陽之艸名黃精餌之可以長生太陰之艸名鈎吻入口卽死蓋野葛之別名也採者不可不辯

僊茅 藏經中所謂阿輪乾陀者是也川浙俱生獨

此山者爲最

何首烏分雄雌兩種雄淡白雌微赤唐李遠云此僊草也五十年者大如拳餌之一年鬚髮返黑百年者大如椀餌之一年齒落更生二百年者大如斗餌之返老還童追及奔馬三百年者大如栲栳中有鳥獸山嶽之紋號爲山精純陽之體久服且成地僊獲餌之且十餘年大小竝進茫無所効李君其欺我耶抑別有咀製之法秘而未傳也

茯苓

溪谷中老松根底多生經云樹老枝葉不復

上升其津氣旋向下泄故凝結成塊耳

石菖蒲

生澗水石隙中其大如筋一寸九節五日

九日採如法製之多服益人聰明久服身輕延年耐老

葛

山谷土厚而背陰之地多生根入土深者爲最

治傷寒解野葛巴豆之毒花色微黃服之消酒不醉蔓燒灰可祛喉痺亦藥籠中之珍品也

山藥

本草所載以懷慶者爲最蓋取其堅實味甘

而効大茲山之產政未易伯仲也

山查 叢生其實大者如慈菰小者如筭子秋至則赤纍纍綴于綠葉間採以入藥消食健脾生啖味甘而微酸差可儼西蜀之櫻桃也

巖松 長三四寸許蓋草屬以其婆婆娑類松故名久藏枯瘁得水卽青翠復活因又號萬年松生懸崖峭壁間採之頗不易惟大王峯頂獨多

芝 有青紫白三色方書云色分六品味應五行俱主祥瑞夜視光彩映目入火不焦久藏不朽餌之可以長生佩之辟兵鎮惡然皆生之五嶽他處鮮

有人亦希邁是三者得毋非其種耶

鹿葱 葉如蘭青翠而稍柔脆花重臺五出裏丹外赭味甘美食之令人忘憂故名忘憂草一說久餌壯陽又名宜男

毛竹 產毛竹洞傍每株數十節節生一枝枝與幹小大不殊

方竹 徧山皆有秋乃生筍甘香脆美當與天目之產並稱

白鷗 狀如雉大倍之素質黑紋嘴爪皆丹

正夷山志  
鷓鴣 形類牝鷄臆前有白圓點羽毛黃紫青碧  
錯成文山谷詩話謂其聲之鳴乃行不得也歌歌  
南越志云鷓鴣雖東南迴翔然始開翅必先南向  
鷓鴣 形如鷺色褐而黑不生卵孕鷓于池澤之間  
能沒水捕魚漁人畜之馴者聽呼名而至每漁時  
先以環束其項再馭入水伺食蒲乃懸足傾而出  
之杜荀鶴云不知此鳥當時亦作何想然漁人亦  
大不仁矣

猿 似猴而大黑色長前臂棲木杪每引臂懸連而  
飲澗中恐其足之履地也土人云其種有三儂猿  
山猿巖猿每清夜送聲聞之悽越

猴 大者爲狙中者爲胡孫大僅如拳者爲王孫  
翁詩云好鳥時時鳴王孫遠相喚則不但猿聲悽  
越矣

桃 所在皆有凡數種一種名鷹嘴其大數倍常桃  
有嘴彎起如鷹種桃者云有寒疾者食之能發汗  
故其品獨貴每花時紅錦紛披澗谷茶歌樵唱與  
牧笛相爲倚和安仁而在當不得以河陽傲十三

僊子矣

武夷山志卷之六終

武夷山志卷之七

東魯袁仲鵠輯撰

游寓篇

世稱人物藉霧于山川乃景公一涕遂削牛  
山千古之色是山川尤引重于人物矣予志  
武夷于賢寓獨加詳焉蓋其人如理學也清  
貞也玄詣也棲逸而騷雅自豪偶涉而流風  
獨尙品流不一然巖岫遺輝游人仰止豈徒  
區區選勝畱連杖屨者哉嗣是而有興焉者

獮左樂爲之戴筆矣

統計凡五十一條

顧野王字希馮吳人仕陳爲光祿卿奉使入閩泛九  
曲歷覽諸勝喟然嘆曰千峰競秀萬壑爭流美哉  
河山真人世所希覲也遂卜居焉梁末侯景兵叛  
乃募義旅附官軍入援本郡寇平復返崇安築室  
武夷生平操履端嚴問學淹貫嘗撰延安記玉篇  
輿地志諸書有盛名于世崇人敦尚文學自野王  
始

張嶠字景山本邑人太傅雷之子也南唐末居武夷  
而混跡樵漁藝祖朝始仕通判歙州境有山斂竭  
力討平之召入超拜御史中丞卒贈工部尚書

劉夔字道元邑之永漿里人具經世大略祥符中應  
詔獻宋都賦送試禮部登進士第累遷給事中樞  
密直學士知鄆州所至有廉名以平京東斂賜璽  
書旌異以議修河與大臣不合遂罷遷工部侍郎  
改戶吏兩部致仕卒年八十三生平好道家言築  
室武夷號北山居士遇隱者授以養生之術富彥

國稱其天賦絕識時推異人孫沔稱其進爲卿相  
退作神僊范文正稱其高風孤躅賀監以後一人  
其見重于時如此卒前六日作遺表以祿分給親  
族謂家人曰吾某日死矣果然所著有武夷山志  
一卷後人重修略本于夔也

詹野先字景舒邑人博洽蘊藉忠敬自持天聖四年  
以賢良應薦後竟不仕隱居武夷廩江之濱每嘯  
咏山水間終日忘倦

游酢字定夫建陽人與兄醇少以文行知名壯游京  
師受業二程之門第進士調蕭山尉近臣薦其賢  
召爲太學錄遷博士隨乞歸築水雲寮於武夷之  
五曲爲講論之所晚徵入拜監察御史知漢陽軍  
及和舒濠三州卒謚文肅

趙抃字閱道浙之衢州人康定間爲崇安令政尚寬  
簡畫之所爲夜必焚香以告天邑介山溪之間每  
春潦泛漲廬舍蕩然地方甚以爲苦公因山築堤  
周廻數里以障之又穿城鑿渠引水溉田民享其  
利而無漂搖之患每公餘輒巾車葉艇嘯咏武夷

山中結吏隱亭于金鷄洞下沿溪種梅每花時香  
聞澗曲治之後圃一株爲其手植迄今尙存後人  
思之稱爲清獻梅銘曰召有棠萊有栢清獻之梅  
碑以石治之西有專祠所著有清獻集

胡安國字康侯邑人登紹興進士嘗入太學師程頤  
之友朱長文及蘄哉之與楊時游醉謝良佐諸賢  
遊良佐稱其如大冬松栢挺然獨秀自王安石廢  
春秋不列學官公獨撰傳以進高宗深加褒納進  
寶文閣直學士與時相不合退居山中自號武夷

翁學者稱爲武夷胡先生卒謚文定憲寅宏寧皆  
其猶子也世稱胡氏五賢縣祠之于學宮之右

胡憲字原仲文定公從子也稍長從文定學獲聞伊  
洛之說以鄉貢入太學會洛學有禁乃陰與劉致  
中殫精研誦復問易于涪陵譙定久始有得兩膺  
詔召俱以母老辭時秦檜當國先生隱處脩然世  
外檜敗始應召爲秘書省正字抗言虜情宜亟用  
張浚劉錡以爲虜備疏入卽求去改秩奉祠時與  
劉彥冲劉致中更相討論于武夷山中學者翕然

尊之稱曰籍溪先生朱元晦呂東萊從游最久有  
論語義兩漢正辯南華經解行世卒謚靖肅

胡寅字明仲安國之從子取而子之幼聞庭訓不忝  
父風登宣和進士敷歷中外改秘校時楊中立爲  
國子司成遂執經請業卒紹伊洛之傳立朝以直  
著聲屢陳復讐大義爲當國者所嫉力求外補除  
禮部侍郎兼直學士趙鼎薦其才可大用會丁外  
艱服闋除知永州輒以疾辭隱居武夷嘗與劉衡  
建奪秀亭於羅漢巘上以爲講學之所扁其居曰  
致堂學者稱致堂先生卒謚文忠有讀書管見論  
語詳說崇正辯等書行世

胡宏字仁仲文定之季子不慕榮祿與其弟寧講學  
武夷山中二十餘年相爲切劘家學淵源于茲爲  
盛紹興中上書極論時相凡數千言以蔭補承務  
郎不赴及檜死被召以疾辭所著有知言編皇王  
大紀八十卷學者稱爲五峰先生

朱熹先生行實諸書備載茲不復贅但山居始末當  
畧志之先生年十四父膏齋沒乃遷居於崇安五

夫里嘗扁讀書之所曰紫陽書堂以新安有紫陽山識鄉關常在目也紹興十八年戊辰先生年二十九中進士授同安主簿秩滿以養母丐祠祿歸結草廬於蘆峰之雲谷扁曰晦庵孝宗卽位恩命沓至屢辭不就張南軒呂東萊力勉其出乃起守南康建白鹿書院爲諸生講學之所除江西提舉改使浙東以賑濟有勞又除直徽猷閣時相主和議陰詆之先生卽辭使節淳熙十年癸卯歸築精舍于武夷五曲大隱屏之下與弟子輩居之時年五十四光宗雖有召命屢遭沮止紹熙二年辛亥始卜居建陽考亭明年屋成先生乃歸時年六十三寧宗朝韓侂胄用事指道學爲僞胡紘沈繼祖陰附之遂奏褫職罷祠先生怡然又創竹林精舍後更號滄洲病叟晚因筮遇遜之同人又號遜翁慶元六年庚申三月甲子以疾終年七十一先生歷仕四朝仕於外者九考立於朝者不能五十日而閑居者四十餘年山林之日長講學之功深也其父松葬下梅之寂歷

劉子翬字彥冲邑人以父韜蔭補承務郎通判興化軍尋以疾辭歸主管武夷冲祐觀有聞命詩云幾年歸夢水雲間猿鶴重尋已厚顏慚愧君恩猶竊祿官衙新帶武夷山山居不出者十七年與胡憲劉勉之每見講學外無雜言從游者皆當時名士如朱元晦其一也學者稱屏山先生有文集二十卷行世追封齊國公謚文靖

劉勉之字致中邑人踰尉以鄉舉入太學時禁挾元祐書獨與胡原仲陰購程氏遺文旦夕講誦又從譙天授游兼邃易學紹興間以呂本中薦召詣闕秦檜慮其持正撓阻和議乃不引見但令策試後省給筆札而已因謝病歸杜門掃軌日與原仲彥冲夷游於丹碧朱松每歎其學有淵源臨疾革遣其子熹往師之遂妻以女學者稱白水先生有集二十餘卷行世

劉衡字兼道邑人膂力絕倫建炎初以勤王補官從韓世忠敗金人於濠累功遷秩晚乃棄歸武夷築小隱堂于茶洞與胡明仲相友善爲文酒之會佳

辰令節每吹鐵笛或慷慨舞劍意氣浩如也

徐幾字子與號進齋邑人嘗與詹琦築靜可書堂於武夷博極羣書尤精於易自晦翁之後理學之傳獨臻其與景定間廷臣交薦以布衣召對授崇政說書上甚器重之詔補廸功郎遷建寧府教授兼興建安書院撰經義以訓多士宇內尊之稱曰進齋先生

袁長吉字叔選邑之大渾里人嘉定中登進士第調靜海掌書記秩滿遂命駕而歸結廬武夷山中扁曰委順因以委翁自號徜徉林泉託興吟咏雖老手不廢卷諸如內典寶錄讖緯方書務窮其奧後學多師事之卒年八十九著有鷄肘等集行世

蔡元定字季通邑人號西山生而穎異于書無所不讀寓居武夷幽貞自勵有詩云數間茅屋環流水布被藜羹飽煖餘不在利中生計較肯於名上着工夫牕前野馬閑來往天際浮雲自卷舒窮達始知皆有命不妨隨分老樵漁從晦翁游凡四十年雖在弟子之列以老友稱之慶元間坐僞學禁以

布衣謫道州文公餞之靖安寺携其子沈慷慨就  
道無幾微見於色坐客莫不偉之所著有太衍詳  
說律呂新書燕樂言辯皇極經世太玄潛虛旨要  
洪範解八陣圖說陰符經解運氣節略脉書總若  
千卷淳祐間追謚文節

蔡淵字伯靜號節齋元定之長子承家學于易理發  
先儒之所未發所著有周易訓解太陽通旨四書  
思問等書行世

楊時字中立將樂人同游酢受業於二程之門紹明  
絕學嘗過武夷與諸賢析疑送難旦夕不少休熙  
寧中第進士累官工部侍郎直學士世號龜山先  
生謚文肅

蔡沈字仲默嘗偕其兄淵築室虎嘯巖下扁曰南山  
艸堂不事章句一以聖賢爲宗受業晦翁之門相  
契尤至翁晚年以諸經之訓釋粗備獨于尙書未  
及爲憾遂以屬之其父亦嘗慨洪範之數失傳心  
雖獨悟未遑論著曰成吾志者沈也沈受父師之  
託殫精紬繹累數十年而註疏始成當事諸公交

薦于朝不就卒謚文正追封崇安伯學者不敢斥其字惟稱之爲九峯先生

蔡杭字仲節號九軒沈之子也構堂於武夷之一曲題曰咏歸嘗讀書其間登紹興進士累官吏部尙書端明殿學士同知樞密院事拜叅知政事以忤時相落職奉祠卒謚文簡改文肅

真德秀字景元浦城人四歲受書過目成誦慶元中第進士累官叅知政事世稱西山先生卒謚文忠嘗築室武夷以朱子爲宗斯文自任黨禁旣開王學賴之以明所著有大學衍義讀書記文章正宗祝穆字和甫其先歙人曾祖確於晦翁爲外祖父康國始卜居崇安與第癸同事文公於隱屏精舍故學有本源嘗輯事文類聚二百餘卷方輿勝覽七十卷行世

劉甫字嶽卿衡之子也事親以孝聞嘗隱于武夷山北水簾洞晦翁與蔡西山諸賢頻詣其廬講明義理嘗訂約晦翁結廬五曲未幾卒晦翁以詩哭之曰曾說幽棲地與君共接連欲携邀月酒同棹釣

魚船遽爾悲聞笛真成嘆絕絃林猿催老淚爲子  
一潸然

游九言字成之初名九思文肅公三世孫也嘗於武  
夷重構水雲寮爲繼述之所以蔭補江西漕司不  
赴進士第一授古田尉江州錄事知光化軍辟荆  
鄂叅謀官卒端平初贈直龍圖閣謚文靖

方士繇字伯謨其先莆田人移居崇安嘗依劉屏山  
朱晦庵於武夷棲止仁智堂追隨講授退惟靜處  
一室繙閱千古肆才於道德性命而統會其旨雖  
僞學禁興人無間言所著遠庵集行世

劉燾字晦伯建陽人與弟炳同學於朱子第進士調  
山陰簿慶元中僞學禁興遂結雲莊書院於武夷  
爲避世計嘉定初召赴行在累官工部尙書年七  
十乞休之章凡二十上不報卒贈金紫光祿大夫  
少師謚文簡配享文公祠

江贄字叔圭邑人宋政和間太史奏少微星見詔徵  
遺逸凡三聘不起乃賜號少微先生居武夷多所  
撰著其最者如通鑑詳節金鑑彙鈔行世

熊禾字去非號退齋又號勿軒邑人登咸淳進士任  
寧武州司戶入元不仕束書入武夷築洪源書堂  
聚生徒講學其間每朔望必詣隱屏精舍展晦翁  
遺像遠近翕然宗之嘗自賦詩云當年衛道大賢  
功人士今知有學宮自嘆升堂慚董子豈無笑列  
議韓公儒風濟濟衣冠舊世事茫茫塵網中我已  
結茅溪九曲飛鳴尙許遡天風所著有易春秋集  
疏四書小學集疏大學廣義標題四書易經講義  
行世又纂儀禮未成而卒

詹師文字叔簡邑人刻勵好學以詞賦名于世慶元  
中第進士調婺源尉時境內盜發文率兵擒之且  
不欲上功以希賞再調江西臬幕復討平峒賊鄧  
亞尤等遷西外宗教不赴歸隱幔亭峰下有幔亭  
遺稿通典編要等書行世

熊蕃字叔茂邑之豐陽里人善屬文長於吟咏頗宗  
王安石之學分章折句大有條貫築堂於鼓樓巖  
下扁曰獨善堂號獨善先生嘗著茶錄品別高下  
最爲精當又有製茶十韻傳誦于世

詹景仁字天麟邑人以文學辟爲三公椽延祐中  
貳浙東憲幕遷江西撫州總管與清江杜本友善  
初本偕范梈以徵辟至都中同寓景仁館談及先  
世知其藏書甚富後本忤時相不用景仁携歸武  
夷築萬卷樓於平川上居之疑義與詞多所剖折  
宇內名流以事道聞者務造其廬

鄭德普字子仁號景厓邑人生有夙慧尤刻意于詩  
與范師孔趙若樵諸人日相酬唱於九曲之間如  
題霧巘云山蒸雲氣晴能雨泉挾風聲夏亦寒題

齊雲峰云石潤黏蒼蘚澗高流白雲皆佳句

趙若樵字子木號霽山邑人宋宗室也登甲科不仕  
性倜儻喜吟咏不治生產嘗徜徉於武夷山水間  
遇會心處輒畱連數日有卽事詩云雲散青山出  
人間白晝長禽聲答空谷木影盡斜陽種菓期秋  
實澆花稱晚涼行藏天已定隨分且徜徉又云可  
意黃鸝喚得醒日移山影正當庭飛花忽趁東風  
過點破苔痕一片青人稱其逼真唐響

杜本字伯原號清碧清江人博極群書尤精皇極之

武夷山志  
三  
旨與虞集范梈友善吳澄劉會孟見而器之江浙  
使相忽刺木薦其才召入不果用詹景仁延歸武  
夷築室於平川上居之遂結思學齋懷友軒爲終  
隱計文宗卽位詔起之山中不赴釋書無逸篇附  
進文宗嘉納之至正三年丞相脫脫奏授翰林待  
制兼國史編修官強應命次武林驛仍以疾辭復  
歸武夷越數年卒有清江碧嶂集行世

杜圻字德基本之孫仍居武夷幼有大志績學砥行  
銳志紹述因名其堂曰思紹爲文雅有古致時論  
偉之以薦舉授甌寧訓轉溫州府教授卒

藍誠字靜之世居武夷山南博學能文蚤歲與弟智  
同學於杜本遂以詩鳴洪武初智舉明經擢西粵  
僉憲以清介著自號藍澗誠號藍山兄弟俱以詞  
名輝映宇內遂登作者之壇所著有山澗詩集行  
世

丘錫字永錫邑人領洪武鄉薦除工科給事自陳願  
學職改楚衡教授永樂四年預修大典改浙衢教  
授宣德七年復預修 太宗皇帝實錄成仍乞原

職改建昌教授自筮仕以來凡五典文衡人服其  
公性嗜學垂老不倦偕其友徐仲禮結社武夷手  
不輟披卒年八十有文集若干卷行世

劉清夫字靜甫建陽人所居與武夷僅隔二舍許常  
寓山中泛舟携酒吟咏殆遍有梅花詞一闕云亂  
山深處見寒梅一朵皎然如雪的皜妍姿羞半吐  
斜映小牕幽絕玉染香腮酥凝冷艷容態天然別  
故人雖遠對花誰肯輕折疑是姑射神仙幔亭宴  
罷迤邐停瑤節愛此溪水供秀潤飽玩洞天風月

萬古叢中百花頭上誰與爭高潔粗桃俗李不須  
連夜催發人多傳誦惜不見全集

鄒守益號東廓江西萬安人嘉靖末南游武夷發明  
良知之學聚生徒于武夷山中至神廟初公之子  
善來總閩憲因追述先志仍與諸生談藝于冲祐  
觀後人思之爲立祠祀

羅洪先號念庵江西吉水人嘉靖壬戌廷試第一官  
翰撰慕武夷之盛投杖入山從游者甚衆踰年乃  
返清標卓行獨冠一時俱有祠祀

王守仁字伯安浙之餘姚人登進士授兵部主事以  
論逆瑾謫貴州龍場驛宰由間道入武夷瑾誅詔  
起累遷至副都御史提督南贛等軍務屢平盜  
以討宸濠功封新建伯卒謚文成嘉靖間郡守劉  
佃檄縣祠之給田以供伏臘其畧云良知之學倡  
自公始也

宗臣字子相南直廣陵人弱冠第進士以銓曹郎出  
督閩學以身範士文體爲之一變嘗與諸生講學  
山中有方城集二十餘卷王弇州嘗爲敘之

傅汝舟字木虛侯官人負雋才善草書尤工於詩好  
談金丹內養之術嘗寓止止庵與山人江一源結  
爲方外之友貽江詩云安得艸堂移傍汝溪光清  
映白綸巾江有相逢却是秦人谷攜手虹橋看日  
斜之句夷猶廢唱相契甚謹有丁戊山人詩集行  
世

丘雲霄字于上邑人博極群書精詞賦工草隸以明  
經授粵西柳城令蒞事首先文治有廉能聲僅踰  
歲遂解官歸結茆于止止庵側因自別曰止山葉

艇芒鞋諸勝鮮不別歷誠一時之文獻士流之師  
表也臺司咸式其廬所著有止止文集數十卷行  
世舊之邑乘蓋其筆也

衷宗周字尚文太樸其別號也邑人風儀秀豁博洽  
淹貫以騷雅鳴海內爲人町畦都盡至臨大事決  
大疑輒又慷慨嚴毅而莫犯也問字之屨常滿戶  
外終日曾無倦容先輩丘雲霄目之曰四時之氣  
備而不言者其哀氏之子耶其先本哀姓系自東  
魯以次子仲孺被知于學使者馮烜爲

題改

今姓家故食貧有司及諸貴游懸榻虛佇不輕一  
就雖炊煙輟舉商歌自娛嘗以向平之累友人丘  
學易者代爲假三百緡于里中兒無何學易客死  
遺孤尙未媿也或私語之曰是無有知者隱之可  
耳公勃然曰何言之不義也卽星馳樞所呼易之  
弟兄泣而告之故袖出所居屋券曰此值可五百  
緡併子母償之矣立携孥避棲環堵意恬如也遺  
孤天行尙能言其事萬曆之季

上靜攝旣久

疆圉備隳上下之情闕隔曰亂形旣萌亂名是諱

國家從此多事矣遂結茅九溪深處署其齋曰白  
賁日擁萬卷以爲終焉之計歿之日正泰昌改元  
之日未幾而寺人之禍作矣迺至于今幅員未靖  
時論以機先之識多之兒時作咏杜宇詩云爾是  
甘心禪何爲徹夜悲驚霧承統處或似漢曹丕又  
咏史云主恩不可忘綠珠墜樓死不知楊子雲當  
年緣底事邑令錢嶧一見嘆異語其父琳曰是兒  
氣岸瑰竒論思淵注雖軒冕不得而縻是頽波之  
砥也卒如所言撰著甚富惟西越游草五嶺行吟

蛙聲白華日鈔等集行世

黃大年字君禾晚歲殫精于內省又自別曰省庸邑  
之長平里人十餘歲時讀書武夷山中夜夢神告  
之曰科場題目八个字子其勉之及得雋其首藝  
乃道之斯行綏之斯來時嘉靖之辛酉也除武岡  
學教故事鄉闈越省而聘房考者非麟經戴禮莫  
與至南闈爲宇內具瞻厥選尤慎庚午之役公以  
尚書應聘蓋當事者特破常格耳入公之殼者八  
人如王堯封于文熙尤當世名士得人之盛鮮與

爲匹數歷中外凡廿餘載並著聲績旣而出守楚  
雄晉陝西行太僕寺少卿未幾抗疏乞休歸里中  
日與二三耆舊結文酒之游巾車畫舫叩皇太姥  
魏子騫之故址累月忘返竟不知其身爲王臣也  
尤精于詩律有咏竝蒂芙渠一聯云榮分御側金  
蓮賜品壓峰頭玉井香又五日泛舟江空鳥下天  
漠漠樓高風撼雲悠悠又寄孺先徵君一律野外  
何人問字來地偏心遠亦悠哉風迴巘岫圖書潤  
日止川原爽氣開袖裏明珠長自詫石中良玉更  
誰猜少微迥與群星異夜夜寒光徹上台爲一時  
膾炙乃全稿散逸識者惜之

李材字孟誠江右之豐城人萬曆間謫戍閩之漳州  
初材之成進士也由刑工兩部主事出按東粵兵  
備滇南所至竝以記名晉右僉都御史開府鄖陽  
適有山賊公討平之言者糾其妄有屠戮下廷尉  
久之始得是命生平及楚事遠而且疑姑闕之特  
就其講學武夷者紀焉公之學以止修爲宗誠正  
爲輔格致爲証入其于伊洛關閩之說獨標新義

武夷山志  
四方之來學者如雲徐公卽登以梓里高足方督  
閩學乃建書院于九曲之濱以居游者孺時兒齒  
未脫猶及窺公之貌或指之曰此見羅先生云豐  
頤廣顙美髭髯首大盈尺譚吐清越洵一世之偉  
人也

葛寅亮字水鑑號岷瞻浙之錢塘人萬曆庚子鄉薦  
第一辛丑成進士由儀部出督楚學及瓜當遷楚  
之人士若公之化弗忍去公也兩臺交章留之得  
請晉秩有加而督學如故擢叅閩藩仍董閩學取人

拔尤之盛蓋輝映而兼譁云時倚輕橈來游武夷  
訪晦翁之故宫探太姥之遺蹟間集子衿輩講學  
于天游觀中生徒卽其地建祠祀公公意弗善也  
命改祀呂仙然人終以祀典不備爲疑乃重鳩工  
于接筭峰下公聞之曰彼紛紛而爲此者果愛我  
乎抑嘗我也復以所祀祀文成王公議者謂公之  
學術事功軒輊陽明宜以公配享輿論翕然莫不  
手額祠凡兩楹而兩撤之公之嚴于近名也如此  
公嘗開社西湖之南屏海內名流鮮不執經北面

故有湖南夫子之稱列聖之學公能識其大者崇  
昔爲公屬邑今茲之先後來宰是邑者柴君世埏  
張君堯政皆公之高足春風化雨惠愛神明何莫  
非淵源之自耶

華亭張公以崇禎丁丑來按閩中風節震勵百寮秉  
度隄邑吏有不職者皆稍稍引去榜警劄于庭柱  
云正人之喜難窺所可窺者見良繭嘉禾卽孝肅  
豈能無咲仁人之怒易解所不解者對猾胥奸吏  
縱日知未免生嗔嘗攬秀山中以天遊爲雄踞群  
巒眺兼衆妙乃建百尺閣于其上顏曰森天按部  
之暇登而吟嘯泉鳴壑轉鳥奏山空迥然振近日  
低雲之响越癸未以開府重臨時流氛日熾益藩  
惑于衆謀遂驅蹕入邵意將南下群議譁然變且  
叵測公立草檄移之長史司其略云宗盟義取維  
城播遷事非獲已樵川雖小已經駐蹕卽難永奠  
厥邦亦旣爰息其馬但有翹企西還之期必無搖  
移南下之理且在國尚不越于郊閔豈出疆可屢  
背乎城郭倘誤信浮言奎輿再動本院必當以死

自誓不敢聞命亦貴司輔導之責也既而返國人  
心以安及

神京告變鍾簾乍移所至騷然瞑目語亂憑叢竊發  
者比比公殫精籌畫鎮以整暇議撫議勦夜協機  
宜每檄下所轄皆披瀝悃誠忠奮激勵讀之使人  
感泣南荒半壁恃以無恐時論以方之陶士行羊  
叔子而慷慨以義折宗藩風稜嶽嶽殆尤過之公  
諱肯堂字載寧鯢淵其自別也登乙丑進士

本芝孫公朝讓其諱光甫其字也吳之嘗熟人辛未  
進士守溫陵以循卓異等晉建南兵憲先是江淞  
草寇羅立楊輝等聚衆千人踞柘浦之界山爲亂  
當事者

題三鎮之兵合勦竟以賄脫散處郡城狼子野心仍  
陰構餘竊謀以除夜竊發殆且岌岌公眎事才數  
日已密商之司李楚蘅柯公籌畫方畧群兇就縛  
懸晉藁街復慮孽猶未殄民心搖於風鶴沅氛日  
迫震鄰兼有 益藩移暉之舉易以生變且崇安  
尺地實咽喉全閩八關旁午禦備久隳一有不虞

無崇是無閩矣迺奏記督撫請躬巡諸隘於是擅  
霜裘霰降隰陟原相度形區闢故址鞏雄圖增置  
塹壁瞻烽前此拆柳而樊之堦垣頓成輪攻莫必  
之堅壘以其暇理青芒彩鷁歷丹巘碧漪繹未絕  
之緒于考亭問駐顏之藥於太姥每興酣咏徐天  
目他日掛冠如此地扣舷處處好高歌之句其躡  
癡溪山雅懷恬退者尚矣未幾移疾乞歸臺使者  
交章請留一夕竟拂衣往矣三郡人士扳卧塞塗  
至追送三百餘里猶不欲返者公爲人規模宏廓  
宅心愷摯飲人以和而不爲煦煦飲已以水而不  
爲涇涇吏旣格心民如爾德穆如矯如清標亮節  
固儀圖於臨眺間矣

武夷山志卷之七終

武夷山志卷之八

溫嶺衷仲孺編訂

祀典篇

禮有天下者祀百神山林川谷丘陵能出雲  
爲風雨見恠物者是也又云法施于民則祀  
之其出雲爲風雨見恠物茲山固已然矣夫  
出雲爲風雨見恠物利澤其民使民瞻仰而  
儼恪非所稱法施而宜祀者哉逖稽往牒  
綸翰之寵賁不無散失茲幸其存者謹彙而

誌之

統計凡七條

南唐寶大九年御帖

勅建州武夷山昇真玄化洞天武夷觀可改賜會僊  
爲額仍令所司日下准備木植別擇高爽清淨去處  
鼎新創造炤依降去式格務要簡樸其山方圓一百  
二十里與本觀護蔭並禁樵採張捕違者所司按法  
施行

宋元符元年封武夷君誥命

勅門下建安之境武夷之巔有真人焉體道之無以  
入於有出而應世屢降吉祥庶想見儀容不忘寤寐  
天道因人而復顯聖名以實而始彰袞寵高風申加  
美稱建州武夷冲祐觀顯道真人宜加封爲顯道真  
君故茲詔示想宜知悉

宋嘉熙二年加封十三真君誥命

尙書省禮部牒建州武夷山冲祐觀僊人魏王子騫  
封冲妙孚惠真君孫綽封霧應真君張湛封顯應真  
君劉景封嘉惠真君趙元奇封妙應真君彭令昭封

冲應真君顧思遠封靜應真君白石先生封善應真君馬鳴先生封惠應真君胡氏僊封普應真君魚道超封助應真君魚道遠封順應真君李氏僊封慈應真君

勅建州武夷山冲祐觀冲妙真人魏王子騫等有功於國利濟斯民属者早魃爲災靡神不宗武夷之山神人所萃望是洞府以祈甘霖不崇朝之間觸石而雨安得不表之爰錫徽名以宏道力可依前件奉勅于右牒到奉行

宋嘉熙元年投送金龍玉簡制章

金龍失傳玉簡尚存本宮

維大宋嘉熙元年歲次丁酉某月朔日嗣天子臣伏

爲係延國祚恭祈嗣續敬齋香信祇建冲科命道士

二十一員於建寧府武夷山昇真玄化洞天冲祐觀

啟建靈寶道場一晝二夜滿散設醮三百六十分位

告盟天地誕集嘉祥謹依舊式詣武夷山昇真玄化

洞天投送金龍玉簡欲聖至聖至真鑒此丹悃乞爲

瞻奏九天臣伏念元儲虛位未開熊夢之祥邊閩分

屯尙調虎符之戍內欲隆於國本外思靖於兵氛仰

惟祖宗積累之艱深切朝夕繼承之懼是用肆類上帝徧禱名山願垂覆幬之仁宏賜扶持之力得男而應震索茂延百世之期偃武而致太平坐底四方之治係基圖於鞏固措民物于救寧祇迓靈休永依大造臣無任懇禱之至謹言

宋嘉熙二年祝文

維大宋嘉熙二年太歲戊戌五月甲寅朔日嗣天子御名謹遣觀察使洪範齋香敬詣武夷山昇真玄化洞天上啟顯道真君十三僊衆伏以至真妙道玄化無方大德高僊神應莫測式袞顯蹟用尙徽稱異鑑茲誠永綏福地御名無任誠惶誠恐悃禱之至

宋端平元年封潘侯誥命

勅建寧府武夷山冲祐觀護法正神潘遇昔以旱魃爲虐致禱山川曾不崇朝甘雨隨降山霧山伯亦旣尊顯有司奏聞謂爾陰相有功於國理宜袞贈以荅神庥可特封通靈協濟侯主者施行

國朝祀典

每歲八月十五日崇安縣官先日具牲醴萬年宮宿

齋致祭于漢祀亭其文曰 維神屹鎮南紀贊化效  
霧由漢迄今祀典有常尚饗

每歲驚蟄日崇安縣官具牲醴鳴金鼓詣喊山臺致  
祭其文曰 惟神默運化機地鍾和氣物產霧芽先  
春特異石乳流香龍圍佳味貢于

天子萬年無替資爾神功用伸常祭尚饗

武夷山志卷之八

